

## **ADYAYA I**

### **PURWAKA**

#### **1.1 Dadalan Pikobet**

Paplajahan basa Bali sampun wenten saking duk purwa kala inggih punika jaman *kolonial*. Sajeroning janane punika sampun wenten utsaha-utsaha anggen nglimbakang basa Bali, sakadi ngaryanin buku-buku basa Bali. Panglimbak paplajahan Bali ring jaman kadi mangkin sampun dados paplajahan *muatan lokal* ring sekolah sane malajahin indik basa, sastra, miwah aksara Bali. Paplajahan basa Bali sampun kaplajahin saking Sekolah Dasar (SD) kantos Sekolah Menengah Atas (SMA). Kawentenan buku basa Bali sane kakaryanin oilih sujana *kebahasaan* ring Bali dahat mawiguna sajeroning paplajahan basa Bali indik nincapang pangweruh basa Bali.

Silih sinunggil sujana basa Bali sane mapesengan I Made Pasek, ngaryanin pupulan satua Bali mamurda Ni Diah Tantri. Buku punika kapanggihin ring Pusat Dokumentasi Dinas Kebudayaan Provinsi Bali. Kaping kalih wenten Sujana I Gusti Bagus Sugriwa taler pinaka panuntun ring Agama Hindu sane ngajahin indik aji pengajah-ajahan nganutin parisolah sane utama. Dane pinaka panuntun miwah tatuladan sane embas ring Bungkulon, Buleleng ring pinanggal 4 Maret 1900 puniki. I Gusti Bagus Sugriwa makarya ring *dunia pendidikan* antuk ngajahin ring Sekolah Dasar ring Desa Bungkulon, Buleleng. I Gusti Bagus Sugriwa taler makarya buku-buku sane mapaiketan sareng *kebahasaan* sakadi Babad Blahbatuh, Kitab Babad Pasek miwah akeh sane tiosan.

Sujana kebahasaan sane taler kasub ring *kalangan pengajar* inggih punika I Nengah Tinggen. Dane embas ring Desa Bubunan ring warsa 1931. Punika silih sinunggil sujana sane ngawi makudang-kudang buku anggen nglimbakang utawi ngwerdiang *ilmu pengetahuan* ring Bali taler *menterjemahkan* lontar-lontar satua Bali ring Gedong Kirtya. Antuk ayahnyane punika, idane kapaica upadana utawi piagam Tanda Kehormatan Satya Lancana Karya Satya saking Presiden Soeharto (1998), Citra Karya Insan Pendidikan Nasional saking Yayasan Pandu Citra Indonesia (2000), Wija Kusumadari Bupati Buleleng (1997), Dharma Kusuma saking Gubernur Bali (2003), miwah makudang-kudang penghargaan sane tiosan.

Buku kawian I Nengah Tinggen sampun kasub ring para guru sajebag Bali. I Nengah Tinggen akeh kauningin makarya buku basa Bali minakadi Sor Singgih Basa, Paribasa Bali miwah pasang aksara Bali, nanging I Nengah Tinggen aran kauningin antuk ngaryanin buku indik sastra sakadi buku pupulan satua Bali. Buku kawian I Nengah Tinggen nenten kacetak manten, nanging ring panglimbak aab sakadi mangkin kawentenan buku-buku kawian I Nengah Tinggen sida karereh ring *media digital* utawi *website*, punika ngawinang dangan ngrereh buku-buku basa Bali sane kaanggen piranti utawi sarana paplajahan taler ngaryanin pitaken sane wenten ring buku basa Bali.

I Nengah Tinggen pinaka pangawi buku satua Bali ring warsa 1993. Buku pupulan satua Bali kawian I Nengah Tinggen akehnyane wenten 15 jilid. Buku sane kaanggen ring tetilikan puniki inggih punika pupulan *Satua Bali I* olih I Nengah Tinggen, madue limang murda inggih punika satua *Ni Daha Tua*, satua *I Rare Angon*, satua *Pedanda Made Putra*, satua *I Sangging Lobangkara*, miwah satua *I Sigir*, *Jleme Tuah Sibak*. Pupulan satua Bali puniki kakaryanin olih I Nengah

Tinggen sane katerbitang olih Toko Buku Indra Jaya ring Jalan Diponogoro No. 32, Singaraja. Buku puniki kacetak kapertama saking Juli 1993.

Tetujon I Nengah Tinggen mupulang satua Bali puniki mangda prasida ngwedarang satua Bali, taler pinaka panglimbak ring *dunia pendidikan*, miwah dados kaanggen panglipur keneh majeng ring alit-alit kadi mangkin. Daging satua punika akehan kapolihang ring Gedung Kirtia Singaraja, nanging pasang sastra sane kaanggen sampun kasilurin manut pasang sastra Bahasa Daerah Bali sane sampun kaparipurnayang. Pengacepnyane antuk panglimbak buku satua Bali punika, prasida kawigunayang majeng ring para sisia utawi mahasiswa mangda nenten meweh antuk ngamolihang piranti buku satua sane daweg punika dados *tugas sekolah* ring paplajahan (*mata Pelajaran*) basa Bali (Tinggen, 2002).

Buku *Satua Bali I* olih I Nengah Tinggen puniki madue kaluwihan sakadi basanyane becik tur lengut miwah dangan keresepong olih pangwacen. Pupulan *Satua Bali I* puniki, madue daging carita pateh sakadi pikobet-pikobet ring kahuripan manusa sadina-dina. Ceritanyane dahat mabuat pisan kaanggen sesuluh taler nudut kayun. Buku pupulan *Satua Bali I* olih I Nengah Tinggen puniki akeh madue piteket sane prasida kaanggen pedoman ri tatkala maparilaksana. Buku pupulan *Satua Bali I* olih I Nengah Tinggen dahat mautama ring kahuripan awinan kawentenan satua punika jadma utamin ipun ring alit-alit pacang uning indik parilaksana becik miwah parilaksana sane nenten patut katulad. Manut ring aab sakadi mangkin, alit-alit patut sewai-wai kaicen satua sane prasida nincapang indik mabuatnyane rasa tresna asih majeng ring padaning manusa miwah sarwa prani.

Buku pupulan *Satua Bali I* dereng polih katilikin saking panilik lianan. Malianan sareng punika, satua-satua sane wenten durung akeh nguningin punika

mawinan buku *Satua Bali I* kaanggen piranti utawi sarana ring tetilikan puniki. Buku pupulan *Satua Bali I* olih I Nengah Tinggen madue pragina miwah wewatekan mabinayan, dadosnyane pangwacen utamin ipun alit-alit madue rerambangan (*imajinasi*) miwah ngrasayang pamargin satua sane kamargiang olih pragina ring satua punika. Buku pupulan *Satua Bali I* madue *nilai pendidikan karakter* sane prasida kaanggen jalaran nincapang parisolah alit-alit (*moral anak*).

Satua ring buku pupulan *Satua Bali I* olih I Nengah Tinggen punika, taler dahat mabuat pisan majeng ring pangwacen. Pupulan satua puniki samian caritanyane madue wangun carita utawi palihan sane runut (*terstruktur*) taler buku pupulan *Satua Bali I* olih I Nengah Tinggen madue basanyane becik tur lengut miwah dangan karesepang olih pengwacen utamin ipun alit-alite. Nika mawinan ring tetilikan puniki pacang katilikin indik wangun carita miwah *nilai pendidikan karakter* sane wenten ring Buku Pupulan *Satua Bali I* olih I Nengah Tinggen.

Tetilikan punika kawigunayang antuk nlatarang indik wangun carita taler *nilai pendidikan karakter* sane wenten ring buku pupulan *Satua Bali I* olih I Nengah Tinggen, mangda kauningin sareng alit-alit miwah pangwacennyan. Kawentenan buku pupulan *Satua Bali I* olih I Nengah Tinggen pinaka silih sinunggil tata cara nglestariang tetamian leluhur utawi lelangit. Tetilikan puniki ngaptiang mangda prasida ngawigunayang *nilai pendidikan karakter* ring kahuripan sane wenten ring pupulan Satua I olih I Nengah Tinggen taler prasida milih parilaksana sane patut kaanggen sasuluh miwah sane nenten. Suksman ngelestariang inggih punika nenten ja wantah maarti nyimpen miwah miara, nanging taler nelebin miwah nglimbakang *nilai pendidikan karakter* sane wenten.

Satua sane kapertama mamurda *Ni Daha Tua*. Satua puniki nyaritayang indik anak tua taler hidup padidi, nenten madue sawitra miwah setata mapairian sareng anak tiosan. Ni Daha Tua puniki taler madue rasa jemet makarya mangda prasida nyalanang kahuripan sadina-dina. Satua sane kaping kalih mamurda I Rare Angon. Satua puniki nyaritayang indik anak sane kandikayang antuk ngrereh I Lubang Kuri oleh Ida Anake Agung, taler kapandikayang ngrereh macan, naga miwah tabuan sirah. I Rare Angon puniki prasida muputang pakaryan sane kanikain sareng Ida Anake Agung. Satua sane kaping tiga mamurda Pedanda Made Putra. Satua puniki nyaritayang indik Pedanda Made Putra sane ngicenin pengajah-ajah majeng okanyane mangda dados anak swasta utawi *mandiri*. Satua sane kaping pat sane mamurda I Sangging Lobangkara. Satua puniki nyaritayang indik I Sangging sane kapandikayang majeng ring Betara Klungkung antuk ngambar samian isin alas, pasih miwah langit. I Sangging Lobangkara puniki prasida muputang samian tugas utawi titah saking Betara Klungkung. Satua sane kaping untat mamurda I Sigir, Jlema tuah Asibak. Satua puniki nyaritayang indik anak sane mala taler nenten uning antuk ajinidane. I Sigir puniki pinaka putra saking Betara Surya, nika ngawinang Ida ngicenin panglukatan sareng I Sigir mangda dados jadma sane nenten mala malih.

Tetilikan indik satua Bali sampun polih kalaksanayang oleh makudang-kudang panilik sane lianan inggih punika, 1) Agustini (2022), 2) Utari (2018), 3) Mudiastini (2015) miwah 4) Ekayasa (2015). Tetilikan saking Agustini (2022) sane mamurda “Nureksain Pawatekan Pragina lan Guna Sarat Sosial ring Pupulan *Satua Bawak Tuan Dewan* Pikardin Ida Bagus Wayan Widiasa Keniten” nyutetang indik kawentenan pawatekan pragina lan guna sarat sosial ring pupulan satua bawak Tuan

Dewan pikardin Ida Bagus Wayan Widiasa Keniten. Tetilikan puniki madue pabinayan sakadi ring satua, piranti (*kartu data*) sane kaanggen ngelaksanayang tetilikan puniki, miwah ring tetilikan puniki pateh ngawiginayang materi indik satua Bali.

Tetilikan saking Utari (2018) sane mamurda “Seseleh Wangun *Intrinsik* lan Basita Paribasa ring Pupulan Satua Bawak *Kacunduk ring Besakih* Pikardin I Gusti Gede Djelantik Santha” nyutetang indik wangun *intrinsik* miwah basita paribasa sane wenten ring pupulan satua bawak *Kacunduk ring Besakih* pikardin I Gusti Gede Djelantik Santha. Tetilikan puniki madue pabinayan sakadi ring panandang sane lagi kaanggen, taler piranti tetilikan (*kartu data*) sane lagi kaanggen.

Tetilikan saking Mudiastini (2015) sane mamurda “Seseleh *Unsur Intrinsik* lan *Nilai Pendidikan Karakter* ring Pupulan Satua Bali II sane Kapupulan Olih I Nengah Tinggen”. Tetilikan puniki madue pabinayan sakadi ring jejering tetilikan, panandang tetilikan, miwah piranti (*kartu data*) sane kaanggen ngelaksanayang tetilikan puniki. Tetilikan puniki pateh nganggen materi indik satua Bali.

Tetilikan saking Ekayasa (2015) sane mamurda “Nureksain Wangun *Intrinsik* lan Aji Pangajah-Ajah Tata Laksana sane Wenten ring Satua-satua Bali.” Tetilikan puniki madue pabinayan sakadi jejering tetilikan miwah piranti tetilikan (*kartu data*) sane kaanggen ngelaksanayang tetilikan puniki, Tetilikan puniki pateh nganggen materi indik satua Bali.

Kadasarin antuk makudang-kudang pikobet sane kapolihang ring ajeng, ring tetilikan puniki pacang kaselehin indik wangun carita miwah *nilai pendidikan karakter* sane wenten ring pupulan *Satua Bali I* olih I Nengah Tinggen. Punika

mawinan murda tetilikan puniki “Seseleh Wangun Carita Miwah *Nilai Pendidikan Karakter* ring Pupulan *Satua Bali I* Peparikan I Nengah Tinggen.”

### **1.2 Ngrereh Pikobet**

Sajeroning tetilikan puniki, sampun ngamolihang makudang-kudang pikobet sane mapaiketan sareng buku pupulan *Satua Bali* kawian I Nengah Tinggen. Pikobet sane sampun karereh inggih punika (1) I Nengah Tinggen sane akeh kauningin makarya buku indik *kebahasan* minakadi Sor Singgih Basa, Paribasa Bali miwah pasang aksara Bali, nanging Ipu aran kauningin antuk ngaryananin buku indik sastra sakadi buku pupulan satua Bali. (2) Kawentenan buku pupulan satua Bali kawian I Nengah Tinggen sane akehnyane wenten 15 jilid. (3) Nyelehin indik wangun carita saking pupulan satua Bali antuk I Nengah Tinggen. (4) Nyelehin *nilai-nilai pendidikan karakter* sane wenten ring pupulan *Satua Bali I* Nengah Tinggen. (5) Kawentenan anggah-ungguhing basa ring pupulan satua Bali antuk I Nengah Tinggen sane meweh karesepang.

### **1.3 Ngwatesin Pikobet**

Ring tetilikan sane pacang kalaksanayang, katureksain malih pikobet sane sampun kapolihang. Pikobet punika kawatesin santukan wenten makudang-kudang parindikan minakadi, kakirangan galah tetilikan, ngicen galah ring panilik lianan nilikin mangda prasida nyangkepin taler maripurnayang tetilikan puniki, miwah parindikan-parindikan sane lianan. (1) nyelehin indik wangun carita saking buku

pupulan *Satua Bali I* olih I Nengah Tinggen. (2) nyelehin indik *nilai pendidikan karakter* saking buku pupulasn *Satua Bali I* olih I Nengah Tinggen.

#### **1.4 Bantang Pikobet**

Nganutin watesan pikobet ring ajeng, bantang pikobet sane prasida kapolihang, inggih punika:

1. Sapunapi wangun carita saking satua Ni Daha Tua, satua I Rare Angon, satua Pedanda Made Putra, satua I Sangging Lobangkara miwah satua I Sigir, Jlema tuah Asibak?
2. Sapunapi *Nilai Pendidikan Karakter* saking satua Ni Daha Tua, satua I Rare Angon, satua Pedanda Made Putra, satua I Sangging Lobangkara miwah satua I Sigir, Jlema tuah Asibak?

#### **1.5 Tetujon tetilikan**

Malarapan antuk bantang pikobet sane sampun kapolihang ring ajeng, tetujon tetilikan puniki, inggih punika.

1. Nlatarang indik wangun carita saking satua Ni Daha Tua, satua I Rare Angon, satua Pedanda Made Putra, satua I Sangging Lobangkara miwah satua I Sigir, Jlema tuah Asibak.
2. Nyantenang indik *Nilai Pendidikan Karakter* saking satua Ni Daha Tua, satua I Rare Angon, satua Pedanda Made Putra, satua I Sangging Lobangkara miwah satua I Sigir, Jlema tuah Asibak.

## 1.6 Kawigunan Tetilikan

Kawigunan tetilikan puniki kakepah dados kalih inggih punika kawigunan pamucuk (*teoritis*), miyah kawigunan panglimbak (*praktis*). Kawigunan pamucuk inggih punika kawigunan tetilikan majeng ring panglimbak widya. Punika mawinan, kawigunan pamucuk puniki nglimbakang widya sane katilikin saking soroh *teoritis* inggih punika ring paplajahan Satua Bali. Kawigunan panglimbak inggih punika kawigunan ri sajeroning tetilikan sane prasida mabuat ring pangurati basa Bali, guru, miyah panilik selanturnyane.

### 1. Kawigunan Pamucuk (*Teoritis*)

Pikoli tetilikan puniki kaaptiang mangdane mawiguna sajeroning paplajahan basa Bali utamanyane paplajahan satua Bali. Tiosan punika tetilikan puniki prasida dahat mawiguna ri sajeroning panglimbak kaweruhan ring paplajahan satua Bali, prasida dados imba sane kaangggen nincapang, nglimbakang kaweruhan indik nyelehin wangun carita miyah *nilai pendidikan karakter* ring pupulan *Satua Bali I Olih I Nengah Tinggen*.

### 2. Kawigunan Panglimbak (*Praktis*)

Kawigunan panglimbak sane kapolihang saking tetilikan puniki inggih punika:

#### a. Majeng ring pangurati satua Bali

Kawigunan tetilikan puniki majeng ring pangurati basa Bali inggih punika, sumangdena dados wacana sane prasida nincapang pangweruh indik melajah satua Bali antuk nyelehin wangun carita miyah *nilai*

*pendidikan karakter* sane wenten ring pupulan *Satua Bali I* olih I Nengah Tinggen.

b. Majeng ring guru basa Bali

Kawigunaan tetilikan puniki majeng ring guru basa Bali inggih punika, dados paplajahan ring sekolah antuk guru, sisia taler samian tingkat satuan pendidikan. Kawentenan tetilikan puniki anggen nelebin indik wangun carita miwah *nilai pendidikan karakter* saking buku pupulan *Satua Bali I* olih I Nengah Tinggen.

c. Majeng ring panilik selanturnyane

Kawigunaan tetilikan puniki majeng ring panilik sane lianan inggih punika, kaaptiang mangda dados bantang sasuratan majeng ring panilik sane lianan, miwah prasida kaanggen piranti pabinayan ri sajeroning ngelaksanayang tetilikan selanturnyane.

